

**REVIZORSKA KOMORA  
FEDERACIJE BOSNE I HERCEGOVINE**

Broj: UV-10-12/16

Datum: 16.02.2016.godine

Na temelju člana 50. stav 9. i člana 64. stav 5. Zakona o računovodstvu i reviziji u Federaciji Bosne i Hercegovine („Službene novine FBiH“ broj 83/09), člana 4. stav 2. tačka d) i člana 17. tačka q) Statuta Revizorske komore Federacije Bosne i Hercegovine, Upravno vijeće na sjednici održanoj 16.02.2016 godine donosi

**ODLUKU  
O OSIGURANJU OD PROFESIONALNE ODGOVORNOSTI ZA ŠTETU  
DRUŠTAVA ZA REVIZIJU U FEDERACIJI BOSNE I HERCEGOVINE**

**Opće odredbe**

**Član 1.**

Ovom Odlukom reguliše se osiguranje od profesionalne odgovornosti za štetu koju društva za reviziju mogu prouzročiti prilikom obavljanja usluga revizije, odnosno registrirane djelatnosti, te za nju odgovaraju na osnovu zakona.

**Član 2.**

Društva za reviziju su dužna osigurati se od profesionalne odgovornosti za štetu koju bi korisnicima revidiranih finansijskih izvještaja – trećim licima moglo počinuti neadekvatno izraženo revizorsko mišljenje.

**Član 3.**

Ugovori o osiguranju od odgovornosti za štete koje bi društvo za reviziju moglo prouzrokovati obavljanjem usluga revizije trebaju pokrivati i štetne događaje za radnje ovlaštenih revizora i drugih lica uposlenih u društvu za reviziju ili na drugi način angažovanih od strane revizorskog društva za obavljanje revizije.

**Osigurana suma**

**Član 4.**

Minimalna svota pokrića po štetnom događaju koje bi društvo za reviziju moglo prouzrokovati obavljanjem usluga revizije banaka, investicijskih fondova i društava za osiguranje iznosi 500.000 KM, a minimalna svota pokrića po štetnom događaju koje bi društvo za reviziju moglo prouzrokovati obavljanjem usluga revizije ostalih korisnika revidiranih finansijskih izvještaja iznosi 50.000 KM.

**Način osiguranja**

**Član 5.**

Osiguranje od profesionalne odgovornosti vrši se tako što svako društvo za reviziju zaključuje ugovor o osiguranju s odgovarajućim društvom za osiguranje (osiguravajuće društvo,

osiguravač) i to osiguranje uredno i blagovremeno produžava. Ugovori o osiguranju od profesionalne odgovornosti koje bi društvo za reviziju moglo prouzrokovati obavljanjem usluga revizije trebaju pokrivati štetne događaje za period od jedne godine. Novoosnovana revizorska društva će ugovorom o osiguranju od profesionalne odgovornosti pokriti period od datuma izdavanja licence za rad od strane Federalnog ministarstva finansija.

#### **Član 6.**

Ugovor o osiguranju od profesionalne odgovornosti društva za reviziju zaključuje se na temelju podnošenja zahtjeva za osiguranje osiguravajućem društvu, u skladu sa općim i posebnim uvjetima za osiguranje od profesionalne odgovornosti pri čemu će se društvu za reviziju uručiti važeći uvjeti osiguranja. Ugovor o osiguranju od profesionalne odgovornosti koje bi društvo za reviziju moglo prouzrokovati obavljanjem usluga revizije iz člana 2. i 3. ove Odluke mora nedvosmisleno pokrivati moguće štetne događaje do minimalnih svota pokrića iz člana 4. ove Odluke.

#### **Član 7.**

Društva za reviziju dužna su kopiju ugovora o osiguranju/polise osiguranja, odnosno kopiju certifikata ili potvrde o izdavanju polise, dostaviti Revizorskoj komori Federacije Bosne i Hercegovine najkasnije 30 dana od dana zaključenja ugovora o osiguranju/polise.

Sva Društva za reviziju koja zaključe ugovor o osiguranju/polisu, su dužna prijaviti sve nastale promjene tokom osiguranja, u roku od 30 dana od dana njihovog nastanka.

#### **Član 8.**

Društvo za reviziju, koje sklopi ugovor o osiguranju od profesionalne odgovornosti, dužno je bez odlaganja obavijestiti osiguravača, o nastanku osiguranog slučaja. Također, društvo za reviziju je obavezno da u roku od 30 dana od nastanka, odnosno pokrenutanja zahtjeva za pokriće štetnog događaja obavjesti Revizorsku komoru Federacije Bosne i Hercegovine o nastanku osiguranog slučaja.

### **Uslovi osiguranja**

#### **Član 9.**

Društva za reviziju, kao obveznici osiguranja u skladu sa Zakonom o računovodstvu i reviziji u Federaciji Bosne i Hercegovine ne mogu ugovoriti osiguranje od profesionalne odgovornosti društava za reviziju kojima će polica osiguranja limitirati broj mogućih štetnih događaja u odnosu na broj i strukturu revizija koje će revizorska društva u periodu osiguranja ugovoriti ili obavljati, odnosno pokrivati osigurane sume po štetnom događaju nižem od iznosa definiranih članom 4. ove Odluke.

### **Prijelazne i završne odredbe**

#### **Član 10.**

Za osiguranje od profesionalne odgovornosti za štetu društava za reviziju i ovlaštenih revizora u Federaciji Bosne i Hercegovine, pored ove Odluke, primjenjivat će se odredbe Zakona o računovodstvu i reviziji u Federaciji BiH i Zakona o obligacionim odnosima (ZOO).

### **Član 11.**

Nepoštivanje odredbi ove Odluke podliježe preispitivanju disciplinske odgovornosti člana Komore u skladu sa odredbama članova 39 – 46 Statuta Komore.

### **Član 12.**

Ova Odluka stupa na snagu danom objavljivanja službenoj internet stranici Revizorske komore Federacije Bosne i Hercegovine.

Stupanjem na snagu ove Odluke prestaje sa važenjem Odluka o osiguranju od profesionalne odgovornosti za štetu revizorskih društava u FBiH broj UV-10-12/11 od 30.11.2011. godine.

Upravno vijeće  
Revizorske komore Federacije Bosne i Hercegovine